




KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 2, No. 1

website: www.geocities.com/navaldiocese

Agosto 2005



Most Rev. Filomeno G. Bactol, D.D.

Mensaje

Wala lang nato damha apan atong gisaulog karong bulan sa Agosto ang unang tuig sa pagmantala nato sa KATILINGBAN. Sulod sa usa ka tuig ang KATILINGBAN nahimong

instrumento sa pagsangyaw sa pulong sa Diyos pinaagi sa binulan nga pagmantala nato niini isip tamdanan sa mga pamalandong sa Ebanghelyo sa matag Domingo. Pinaagi niini, nakaabot ang Pulong sa Diyos ngadto sa mga layo nga dapit sa atong parokya. Pagkamaayo gayud sa Diyos!

Sa atong pagpasalamat sa Diyos niining gasa sa mantalaan nga iyang gihatag kanato, ato usab ipakita Kaniya ang atong kadasig sa pagpatalinghug ug paghatag ug bili sa Iyang mga hatag. Human sa paggamit nato sa KATILINGBAN, dili nato gision o ilabog ang atong kopya kundili ato kining taguan. Atong giawhag ang tanang mga selda sa pagtago o pagfile sa ilang mga kopya sa KATILINGBAN aron duna kitay magamit pa sa pag-abot sa panahon nga manginahanglan kita.

Apan dili lamang ang KATILINGBAN ang atong ampingan. Mas importante ang pag-amping nato sa Pulong sa Diyos nga maoy gimantala sa KATILINGBAN. Maipakita nato nga gi-ampingan nato ang Pulong sa Diyos kun ato kining gimantala adlaw-adlaw diha sa atong mga pulong ug binuhatan. Kay ang Pulong sa Diyos dili angayan nga mahikut ug mahisulat lamang sa papel, kundili nga mamantala gayud kini sa papel sa kinabuhi.

Sa atong pagsaulog sa unang anibersaryo sa KATILINGBAN, gipanghinaut nato ang paglambo pa sa atong Katilingban, ang Buhing Katilingban sa Diyos, diha sa mga Gagmay'ng Kasilinganang Simbahan.

Ang panalangin sa Diyos maanaa kaninyo kanunay!

Bishop FILOMENO G. BACTOL, D.D.
ug mga Kaparian sa Naval



PAMALANDONG SA EBANGHELYO

Agosto 7, 2005: Ika-19 nga Domingo "sulod sa tuig"
Basahon: 1kgs. 19: 9, 11-13 / rom. 9: 1- 5 /
Mateo 14: 22-33

Tema:

Gitubag ni Cristo ang panginahanglan sa mga disipulo kinsa nagpusngapusnga na sa kalisang. Nakakita si Pedro kang Cristo, mikanaog gikan sa sakayan, ug milakaw usab siya sa tubig. Wala madugay mikabos ang iyang pagtoo ug siya mitidlom. Apan giluwat siya ni Cristo. Dili lang kay buot si Pedro nga mahisama siya kang Cristo, naninguha gayod siya. Siya man gani ang mihimo sa unang mga lakang paingon ngadto kaniya.

Naninguha si Pedro apan napakyas siya sa dihang iyang gibuwag ang iyang panan-aw gikan kang Cristo ug milingi ngadto sa mapintas nga mga balod. Ang pagduhaduha ug pagkabalaka mahitungod sa usa ka suliran, inay mangita ug kasulbaran niini maoy sagad hinungdan sa atong mga kapakyasan.

Pamalandongi kini:

Motuo ka ba nga makahimo og susamang milagro si Cristo diha sa imong kaugalingong kinabuhi? Alang kanimo unsa may kahulogan sa pulong pagtoo?

Agosto 14, 2005: Ika-20 nga Domingo "Sulod sa Tuig"
Basahon: Is. 56: 1, 6-7 / Rom. 11: 13-15, 29-32 /
Mateo 15: 21-28

Tema:

Miadto si Jesus sa Tiro ug sa Sidon, mga distrito sa mga Hentil, aron paglikay gikan sa iyang mga kaaway nga nagsamok kaniya kay lagi wala man siya mosunod sa mga rito sa paghinlo. Dinhi iyang

bag-ohon ang mga kalainan nga nagbulag sa mga giisip nga hinlo gikan sa dili hinlo. Pinaagi sa pagpangaliyupo sa usa ka babaye nga taga-Canaan, tataw nga si Jesus nagtudlo nga aduna diay kaluwasan bisan ang mga Hentil.

Ang kahilom ng gipakita ni Jeus agig tubag sa pangutana sa maong babaye naghulagway lamang kon giunsa sa pagtagad sa mga Judio ang mga dili Judio. Daw nanagana siya. Apan sa dihang mihukom siya sa pagtubag sa babaye, ang iyang tubag nakapahingangha gayod sa tanan. Buot lamang niyang tumanon ang kabubut-on sa Dios sa pagtigom pag-usab sa mga nagkatibulaag ug nangawala nga mga karnero sa Israel. Sumala lamang niining pagtuoha nga kabahin sila sa dakong banay ni Abraham nga sila mamahimong sagoapon ug dawaton ni Jesus. Apan unsa ba gayud ang problema sa babaye? Wala ba siya nangayo nga makig-ambit sa Diosong pagpakighigala nga ila lamang sa mga Judio. Igo lang baya siyang nangayo ug momho. Apan sa iyang pagpangayo nagmapaubsanon ug masaligon siya nga iya gayong mabatonan ang hingpit nga kaluwasan nga dugay na niyang gipangandoy ug gitinguha. Niining pagsagop nga gipakita ni Jesus, nakakita ang mga matuohon sa unang siglo og modelo nga mamahimo

Nilang sumbanan sa ilang pagtagad sa mga Hentil. Ang mga matuohon sa unang siglo mipakitag samang pagtagad sa tanang kaliwatan tungod kay ila mang gisangyaw nga ang kaluwasan – kanang kaluwasan nga pinasikad sa pagtuo - alang gayod sa tanang katawhan.

Pamalandongi kini:

Ikaw maantigo bang mobuntog nianang sayop nimong pagtuo ug pag-isip sa uban – ilabi na niadtong dili nimo isigkamagtutuo – aron masangyaw nimo ang kaluwasan, kanang kaluwasan nga gitanyag ni Cristo alang sa tanang katawhan? Sa makadaghan sila giisip nimong nga langyaw mao na hinoon ang magtudlo kanimo sa kahulugan sa imong gituohan!

Agosto 21, 2005: Ika-21 nga Domingo “sulod sa tuig”
 Basahon: Is. 22: 15, 9-23 / Rom. 11:33-36 /
Mateo 16: 13- 20

Tema:

“Ikaw mao ang Mesiyas, ang Anak sa buhing Dios! Ikaw si Pedro ug ibabaw niining bato tukoron ko ang akong Simbahan”. Mao kini ang mga pagmatuod ni Pedro kang Jesus ug si Jesus kang Pedro, mga pagmatuod nga may kalabotan sa pagtuo sa matag magtutuo. Apan aduna pay mas labaw niining ilang mga pagmatuod.

Gipangutana ni Jesus ang iyang mga tinun-an kinsa ang Anak sa Tawo sumals sa mga tawo sigun sa gipaabot sa kadaghanan miingon sila nga ang Anak sa Tawo mao si Elias nga mibalik aron pagpaila sa pag-abot sa Adlaw sa Ginoo (Malaquias 3:23-24). O diba hinuon usa sa mga propeta. Lakip na niini si Juan nga Magbubunyag. Sa tinuod si Jesus usa kahalandong propeta. Unya gipangutana pag-usab ni Jesus ang iyang mga tinun-an kon kinsa siya alang kanila. Siya usa ka propeta ug mas labaw pa kay sa propeta. Tinuod gayod nga iyang gipaila ang pag-abot sa panahon sa Mesiyas tungod kay ang simbahan nakadungog man kang Pedro nga miingon : siya mismo ang Mesiyas - ug labaw pa kay sa Mesiyas. Siya mao ang “Anak sa Dios nga buhi”.



KATILINGBAN
 Ang akong mga rantalanan sa Basik Espiritual Community (BEC) sa parokya sa Masak

TEAM MINISTRY

Team Moderator: Bishop Filomeno G. Bactol, D.D.

Team Members: Fr. Marvyn A. Maceda
 Fr. Benjamin C. Pantas
 Fr. Jesus G. Ty
 Fr. Kenneth Hendricks
 Fr. Dario Bebillo
 Fr. Bing Colasito

Writers/Researchers:
 Salvador Castro Reymund Icaín
 Ramises Bongabong Linda Roldan
 Eudoxia Canonoy Necitas Casado
 Catalina Machete Gualberto Tonelete

Encoders:
 Vinna Sabroso Sonia Pitao
 Josephine Romero

Circulation Managers:

Jorge Manco
 Danilo Jayubo
 Jonnel Quilaneta
 Alfredo Olaer

Business Managers:

Rizalito V. Curso
 Conchita Calvez

Computer Specialist
 Oscar O. Borrinaga

Dili katingad-an nga kinahanglan madungog nato gikan kang Pedro kining pagpadayag sa pagtuo ngadto sa bag-ong natawo nga Simbahan sa sinugdanan gayod sa kasaysayan niini. Diha sa pagpahayag sa pagtuo nga gihimo ni Pedro gitukod ni Jesus ang iyang Simbahan. Si Jesus mipaila sa iyang kaugalingon pinaagi kang Pedro, ang mainitong tinun-an, apan mao usab ang tinun-an nga molimod kaniya. Gisangonan niya si Pedro sa pagpalambo sa iyang mga kaigsoonan hangtod mga moabot ang gingharian. Sa Simbahan si Pedro naila sa iyang pagkabato, ingon nga si Pablo mao ang misyonero. Labaw sa tanan, ang simbahan mao ang banay natong mga kabos nga magtutuo taliwala sa pagtuo ug sa pagduhaduha, sa kamanggihatagon ug sa pagkamabudhion, apan bisan pa niini, sama kang Pedro, nagkangakanga kitang miingon: “Nagatuo ako”

Pamalandongi kini:

Pinaagi sa mga pagpanudlo sa Santo Papa, sa mga kaobisohan, ug sa mga kaparian, milambo ba ang imong pagtuo?

Alang kanimo kinsa man ang “Anak sa Tawo”?

Agosto 28, 2005: Ika-22 nga Domingo “sulod sa tuig”
Basahon : Jer. 20: 7-9 / Rom. 12:1-2 / **Mateo 16:21- 27**

Tema:

Sa pahayag sa pagtuo nga gihimo didto sa Caesaria Filipino, ang bida mao si Pedro ug dili si Jesus. Sa ebanghelyo ang sunod nga hitabo naglig-on niining maong pagpahayag. Talagsaon kaayo nga nakalakaw si Pedro ibabaw sa tubig, apan mas talagsaon nga ang iyang matuohong pahayag gisundan dayon sa iyang kakulang sa pagtuo.

Naila ni Pedro si Jesus nga mao ang Mesiyas. Apan gitan-aw niya ang ang pagka-mesiyas isip himaya sa harianong kadaugan. Galing lang ang Magtutudlo mipaila sa iyang kaugalingon nga mao ang nanag-antus nga sulugoon nga maoy motubos sa iyang katawhan pinaagi sa iyang pagpasakit, kamatayon ug pagkabanhaw, sumala sa basahon ni Propeta Isaias. Nasabtan sa mga tinun-an ang kahulugan sa kamatayon apan wala nila masabti ang


kahulugan sa pagkabanhaw. Busa ang madalidaliang Pedro misukol batok sa daw mabangis nga laraw sa Dios. Sa kalit mibali ang hangin. Si Pedro, nga gidayeg ni Jesus nga “bulahan” human saiyang pahayag sa pagtuo, pintok nga gikasab-an ni Jesus: “Pahawa, Satanas!” Ang bato nga may igong kalig-on aron matukoran sa Simbahan, karon nahimo na hinoong babag, usa ka bato nga makapandol padulong sa Mesiyas. Sa unang bahin giingnan ni Jesus si Pedro, “ Ang akong Amahan nga atua sa langit maoy naghatag nimo niini,” apan karon si Jesus miingon kang Pedro, Ang imong hunahuna, hunahuna sa tawo ug dili sa Dios.”

Ang pulong, “Pahawa, Satanas!” mahimong hubaron nga, “ Ari luyo kanako ug sunod kanako. Tinun-an ka lang ug ang matag tinun-an kinahanglan mosunod sa magtutudlo.” Ang Kristiano dili gayod makalingkawas sa krus sa kaluwasan ug ni Cristo. Tinuod gayod nga ang sukdanan sa Dios dili sama sa sukdanan sa tawo.

Pamalandongi kini:

Ang imong pagkinabuhi nagpahayag ba sa pagtuo nga imong gihuptan? Alang kanimo unsa man ang kahulugan sa kamatayon?

Ang kahulugan sa pagkabanhaw?



NAVAL COUNTRY INN
"Your home away from home"
 &
NAVAL TOWN CENTER

PICTORIALS



LUMALABAY SAMA SA BULAK

Pila ka tuig kanhi, dihay batang lalaki nga naglibotlibot sa estante sa mga kendi sa tindahan aron pagpili sa iyang paliton. Ang iyang inahan nga gikapoy nag hulat, mitawag: “Pagdali na, gastoha na ang imong kwarta! Molakaw na kita.” Siya mitubag: “Apan Mama, singko sentabos lang ang akong kwarta, busa kinahanglan gastohon ko kini sa husto.”

Sa samang paagi, usa lamang ang akong kinabuhi, busa kinahanglan ikinabuhi ta kini sa hustong paagi. Kon napulo pa ang kinabuhi ta, lagmit makaako kita paggahin sa usa niini sa kalingawan o sa pagpangitag kwarta.

Sa paghatag ug bili sa kamubo sa kinabuhi, ang Biblia migamit sa daghang ilustrasyon, sama sa pagtandi niini ngadto sa usa ka bulak (Salmo 103: 15-16). Ang bulak matahom nga butang. Ingon nga sudlanan sa dugos, sagad kining moalimyon ug mopaaghat sa proseso nga gikinahanglan aron mosibol ang bag-ong binhi. Apan ang labaw kong napanid-an sa usa ka bulak mao ang pagkadaling mahanaw sa katahom niini.

Kay mubo man ang kinabuhi ta sa kalibotan, kinahanglan pahimudsan ta ang atong “tingpamulak.” Ang dugos sa gugma sa Dios sa kasingkasing ta kinahanglan modala sa katawhan ngadto sa Manluluwas. Ang atong kinabuhi kinahanglan magmabulokon uban sa espirituhanong pag-alagad. Hinumdomi nga kita gitugtan sa pagpamulak alang sa ulosahong tumong sa pagpasibol sa bag-ong binhi (pagdala sa uban ngadto kang Cristo).

Mubo ang imong kinabuhi – himoa kining matahom! *(Henry Bosch)*

Source: “Atong Kalan-on sa Adlaw-Adlaw”

BEC Schedule/Activities

(August 2005)

- August 6 – **Cluster Fellowship**
BEC Ilaya/Smo. Rosario
Host Area: BEC Takung
Lugar: Cathedral Church
- August 20 - **Parochial Fellowship**
Lugar: Brgy. Catmon Chapel
- August 21 - **Parochial Fellowship**
Lugar: Brgy. Calumpang Chapel

BEC Anniversary

BEC Sitio Rosaes
August 3, 2005 (Miyerkules)

BEC Brgy. Agpangi
(Immaculate Concepcion)
August 13, 2005 (Sabado)

BEC Sitio Puro-Bliss
August 16, 2005 (Martes)

BEC Sitio San Roque - Larrazabal
August 27, 2005 (Sabado)



LJC Rice Mill & Groceries
Sitio Lupa, Calumpang Ground Floor, Naval Mall
Owned and Managed by:
BONG BONGABONG